

við álagningu opinberra gjalda á árinu 1962. Gilda ákvæði hennar einnig um innheimtu eftirstöðva einstakra gjalda, er þá kunna að vera ógreidd, að svo miklu leyti, sem Gjaldheimtunni verður falið að innheimta slíkar eftirstöðvar.

Fjármálaráðuneytið, 14. ágúst 1962.

F. h. r.

Sigtr. Klemenzson.

Kristján Thorlacius.

REGLUGERÐ

um breyting á reglugerð nr. 79 27. maí 1960, um skipan
gjaldeyris- og innflutningsmála o. fl.

1. gr.

Síðari málsg. 7. gr. reglugerðarinnar orðist svo:

Þegar um innflutning frílistavöru gegn gjaldfresti er að ræða, ber innflytjanda, áður en varan er send af stað frá útlöndum, að gera viðskiptabanka grein fyrir væntanlegum innflutningi og semja um greiðslufyrirkomulag vörunnar.

2. gr.

Reglugerð þessi, sem sett er samkvæmt lögum nr. 30 25. maí 1960, um skipan innflutnings- og gjaldeyrismála o. fl., öðlast gildi 1. júní 1962.

Viðskiptamálaráðuneytið, 24. maí 1962.

Gylfi Þ. Gíslason.

Oddur Guðjónsson.

AUGLÝSING

um sérstakar varúðarráðstafanir í sambandi við notkun eiturefna
við úðun trjágarða.

1. gr.

Allir þeir, er nota eitruð efni til úðunar á trjágörðum, skulu gæta fyllstu varúðar í meðferð slíkra efna. Skal þeim skylt að festa upp á áberandi stað við hvern garð, sem úðaður er, prentaðar leiðbeiningar með nauðsynlegum varúðarreglum. Jafnframt skal öllum íbúum viðkomandi húss gert viðvart áður en úðun hefst, svo og íbúum aðliggjandi húsa.

2. gr.

Um brot gegn ákvæðum auglýsingar þessarar fer eftir 11. gr. laga nr. 24 1. febrúar 1936, um eftirlit með matvælum og öðrum neyzlu- og nauðsynjavörum.

Framangreind ákvæði eru sett samkvæmt lögum nr. 24 1. febrúar 1936, um eftirlit með matvælum og öðrum neyzlu- og nauðsynjavörum, og öðlast gildi þegar í stað.

Í heilbrigðismálaráðuneytinu, 18. júní 1962.

Bjarni Benediktsson.

Eliás Eliasson.

AUGLÝSING

um breyting á auglýsingu um skilyrði fyrir ótakmörkuðu lækningaleyfi
nr. 155 22. sept. 1942.

Við auglýsinguna bætist ný málsgrein, svohljóðandi:

Nú hefur umsækjandi um skeið starfað sem kandídat í einhverju eftirtalinna sjúkrahúsa: Fjórðungssjúkrahúsi Ísafjarðar, Fjórðungssjúkrahúsi Norðfjarðar, Kristneshæli, Vífilsstaðahæli, Sjúkrahúsi Vestmannaeyja, Sjúkrahúsi Keflavíkur eða Sjúkrahúsi Akraness, og leggur fram skilríki fyrir því, og stýttist þá skylduþjónustutími sá, sem tilskilinn er í fyrri málsgrein, um þann tíma, sem hann hefur unnið á fyrrgreindum stofnunum.

Reglur þessar gilda fyrst um sinn og þar til öðruvísi kynni að verða ákveðið.

Þetta birtist hér með til leiðbeiningar þeim, sem hlut eiga að máli.

Heilbrigðismálaráðuneytið, 11. júlí 1962.

F. h. r.

Baldur Möller.

Eliás Eliasson.

REGLUGERÐ

um hámarkshraða ökutækja á Keflavíkurflugvelli.

1. gr.

Hámarkshraði ökutækja á öllum vegum lögsagnarumdæmis Keflavíkurflugvallar er ákveðinn 45 km á klukkustund, með þeim undantekningum, er greinir í 2. gr.

2. gr.

Á eftirtöldum vegum má þó hámarkshraði vera 70 km á klukkustund:

- Flugvallarbraut frá aðalhlíði flugvallarins að gatnamótum Víkingsgötu.
- Flugbraut „F“ frá Austurbraut að Alþjóðavegi.
- Grjótagata og Austurbraut frá NCO-klúbbum að Grænáshlíði.

3. gr.

Reglugerð þessi, sem sett er samkv. heimild í 4. mgr. 50. gr. umferðarlaga nr. 26 frá 1958, öðlast þegar gildi og birtist til eftirbreytni öllum þeim, sem hlut eiga að máli.